

**O‘ZBEKISTON RESPUBLIKASI VAZIRLAR MAHKAMASINING
QARORI**

**TURIZM FAOLIYATINI LITSENZIYALASH TARTIBI TO‘G‘RISIDAGI NIZOMNI
TASDIQLASH HAQIDA**

O‘zbekiston Respublikasi Prezidentining “O‘zbekiston Respublikasining turizm sohasini jadal rivojlantirishni ta‘minlash chora-tadbirlari to‘g‘risida” 2016-yil 2-dekabrda PF–4861-son **Farmonini** va O‘zbekiston Respublikasi Prezidentining “O‘zbekiston Respublikasi Turizmni rivojlantirish davlat qo‘mitasi faoliyatini tashkil etish to‘g‘risida” 2016-yil 2-dekabrda PQ–2666-son **qarorini** bajarish yuzasidan Vazirlar Mahkamasi qaror qiladi:

1. Turizm faoliyatini litsenziyalash tartibi to‘g‘risidagi nizom **1-ilovaga** muvofiq tasdiqlansin.

2. O‘zbekiston Respublikasi Turizmni rivojlantirish davlat qo‘mitasi uch oy muddatda ushbu qaror kuchga kiringunga qadar berilgan litsenziyalarni xatlovdan o‘tkazsin, litsenziya bitimlarining mazkur qaror bilan tasdiqlangan Turizm faoliyatini litsenziyalash tartibi to‘g‘risidagi **Nizom** talablariga muvofiqlashtirilishini ta‘minlasin.

3. O‘zbekiston Respublikasi Hukumatining **2-ilovaga** muvofiq ayrim qarorlari o‘z kuchini yo‘qotgan deb hisoblansin.

4. Mazkur qarorning bajarilishini nazorat qilish O‘zbekiston Respublikasi Bosh vazirining o‘rinbosari R.S. Azimov zimmasiga yuklansin.

O‘zbekiston Respublikasining Bosh vaziri A. ARIPOV

Toshkent sh.,
2017-yil 6-aprel,
189-son

Vazirlar Mahkamasining 2017-yil 6-apreldagi 189-son **qaroriga**
1-ILOVA

Turizm faoliyatini litsenziyalash tartibi to‘g‘risida

NIZOM

1-bob. Umumiy qoidalar

1. Ushbu Nizom O‘zbekiston Respublikasining “**Faoliyatning ayrim turlarini litsenziyalash to‘g‘risida**”, “**Turizm to‘g‘risida**”gi qonunlariga, O‘zbekiston Respublikasi Prezidentining “O‘zbekiston Respublikasining turizm sohasini jadal rivojlantirishni ta‘minlash chora-tadbirlari to‘g‘risida” 2016-yil 2-dekabrda PF–4861-son **Farmoniga** va O‘zbekiston Respublikasi Prezidentining “O‘zbekiston Respublikasi Turizmni rivojlantirish davlat qo‘mitasi faoliyatini tashkil etish to‘g‘risida” 2016-yil 2-dekabrda PQ–2666-son **qaroriga** muvofiq turizm faoliyatini litsenziyalash tartibini belgilaydi.

Oldingi tahrirga qarang.

2. Turizm faoliyatini litsenziyalash O‘zbekiston Respublikasi Turizmni rivojlantirish davlat qo‘mitasining Qoraqalpog‘iston Respublikasi, Andijon, Jizzax, Qashqadaryo, Navoiy, Namangan, Sirdaryo, Surxondaryo va Farg‘ona viloyatlari hududiy boshqarmalari, Buxoro, Samarqand, Toshkent, Xorazm viloyatlari va Toshkent shahri turizmni rivojlantirish departamentlari (keyingi o‘rinlarda litsenziyalovchi organ deb ataladi) tomonidan amalga oshiriladi.

(2-bandning birinchi xatboshisi O‘zbekiston Respublikasi Vazirlar Mahkamasining 2018-yil 1-oktabrdagi 781-sonli qarori tahririda — Qonun hujjatlari ma‘lumotlari milliy bazasi, 03.10.2018-y., 09/18/781/1984-son)

Turizm faoliyatini litsenziyalash ushbu Nizomga **ilova** qilingan sxemaga muvofiq amalga oshiriladi.

3. O‘zbekiston Respublikasida belgilangan tartibda ro‘yxatdan o‘tgan, litsenziyalovchi organga turizm faoliyatini amalga oshirishga litsenziya berish to‘g‘risidagi ariza bilan murojaat qilgan yuridik shaxs (turizm operatorlari, turizm agentliklari, ekskursiya tashkilotlari, turizm firmalari) (keyingi o‘rinlarda litsenziya talabgori deb ataladi) litsenziya talabgori bo‘lishi mumkin.

4. Turizm faoliyatini amalga oshirish huquqini beruvchi litsenziyalar turizm xizmatlari ko‘rsatish shartnomasi shartlariga muvofiq turlarni tashkil etish bo‘yicha xizmatlar, jumladan band (bron) qilish, joylashtirish, tashish, ovqatlanishni tashkillashtirish, shuningdek rekreatsiya, ekskursiya va boshqa xizmatlar ko‘rsatuvchi litsenziya talabgorlariga beriladi.

Bunda ekskursiya xizmatlari ko‘rsatuvchi yakka tartibdagi tadbirkorlar uchun turizm faoliyatini amalga oshirish huquqini beruvchi litsenziya olish talab etilmaydi.

5. Litsenziyalovchi organ litsenziyani quyidagi uch yo‘nalish bo‘yicha beradi:

ichki turizm — O‘zbekiston Respublikasida doimiy yashovchi jismoniy shaxslarga O‘zbekiston Respublikasi hududida turizm faoliyatini amalga oshirish huquqi uchun;

chiqish turizmi — O‘zbekiston Respublikasida doimiy yashovchi jismoniy shaxslarga O‘zbekiston Respublikasidan tashqarida turizm faoliyatini amalga oshirish huquqi uchun;

kirish turizmi — O‘zbekiston Respublikasidan tashqarida doimiy yashovchi jismoniy shaxslarga O‘zbekiston Respublikasi hududida turizm faoliyatini amalga oshirish huquqi uchun.

6. Turizm faoliyatini amalga oshirish huquqiga namunaviy (oddiy) litsenziyalar beriladi.

7. Turizm faoliyatini amalga oshirish huquqini beruvchi litsenziya amal qilish muddati cheklanmasdan beriladi.

2-bob. Litsenziya talablari va shartlari

8. Quyidagilar turizm faoliyatini amalga oshirishda litsenziya talablari va shartlari hisoblanadi:

a) turizm to‘g‘risidagi qonun hujjatlariga, turizm sohasidagi xalqaro standartlarga va O‘zbekiston Respublikasi standartlariga majburiy rioya qilish;

b) yuridik shaxs shtatida “turizm” yo‘nalishidagi oliy ta‘lim yoxud o‘rta maxsus, kasb-hunar ta‘limi diplomiga yoki litsenziyalovchi organ tomonidan belgilangan tartibda 3 yil muddatga beriladigan amaldagi malaka sertifikatiga ega bo‘lgan kamida bir nafar mutaxassis bo‘lishi;

v) yuridik shaxs xodimlari (gidlar (ekskursiya yetakchilari) va yo‘riqchi-yo‘l boshlovchilar) 3 yilda kamida bir marta litsenziyalovchi organ belgilagan tartibda malaka sertifikati olishi;

Oldingi tahrirga qarang.

(8-bandning “g” kichik bandi O‘zbekiston Respublikasi Vazirlar Mahkamasining 2018-yil 1-oktabrdagi 781-sonli qaroriga asosan chiqarilgan — Qonun hujjatlari ma‘lumotlari milliy bazasi, 03.10.2018-y., 09/18/781/1984-son)

d) turizm faoliyatini amalga oshirish uchun yo‘nalishiga ko‘ra:

“ichki turizm” — yuridik shaxsning tegishli tashkiliy-huquqiy shakli uchun qonunchilikda belgilangan miqdorga teng;

Oldingi tahrirga qarang.

“chiqish va kirish turizmi” — bazaviy hisoblash miqdorining kamida 400 baravari miqdorida shakllantirilgan ustav jamg‘armasiga ega bo‘lishi;

(8-band “d” kichik bandining uchinchi xatboshisi O‘zbekiston Respublikasi Vazirlar Mahkamasining 2019-yil 28-dekabrda 1046-sonli qarori tahririda — Qonun hujjatlari ma‘lumotlari milliy bazasi, 29.12.2019-y., 09/19/1046/4242-son)

e) turizm xizmatlarining muvofqlik sertifikati bilan tasdiqlangan turistlar va ekskursiyachilarning hayoti, sog‘lig‘i va mol-mulki uchun xavfsizlikni ta‘minlash bo‘yicha tizimning mavjudligi;

j) mijoz bilan faqat O‘zbekiston Respublikasi qonun hujjatlari talablariga muvofiq shartnoma, shu jumladan, elektron tarzda (onlayn) tuzilgandan keyin turizm xizmatlari ko‘rsatish;

z) chet davlatga chiqish, kelish va u yerda bo'lishning o'ziga xos xususiyatlari, turistik sayohat vaqtida o'zini tutish xususiyatlari hamda har bir muayyan mamlakatda bo'lishning boshqa qoidalari to'g'risidagi to'liq ma'lumotlarni har bir turistga belgilangan tartibda yetkazish;

i) mijozga litsenziatning ish rejimi, uning joylashgan joyi (pochta manzili), tegishli litsenziya, turizm xizmatlari sertifikatining mavjudligi, turizm faoliyatining aniq yo'nalishlari uchun mas'ul bo'lgan litsenziatning mutaxassislari familiyasi, ismi, otasining ismi to'g'risida to'liq va batafsil ma'lumot berish, jumladan, ushbu ko'rsatilgan ma'lumotlarni o'zining xalqaro internet tarmog'idagi rasmiy veb-saytiga joylashtirish.

Oldingi tahrirga qarang.

k) Har yili 500 nafardan ortiq turistga xizmat ko'rsatilganda litsenziatda elektron to'lovlar, bron qilish, ekvayring kabi xizmatlar ko'rsatuvchi ko'p tilli veb-sayt mavjud bo'lishi.

(8-band O'zbekiston Respublikasi Vazirlar Mahkamasining 2018-yil 29-maydagi 398-sonli qaroriga asosan "k" kichik band bilan to'ldirilgan — Qonun hujjatlari ma'lumotlari milliy bazasi, 01.06.2018-y., 09/18/398/1288-son)

3-bob. Litsenziya olish uchun zarur bo'lgan hujjatlar

9. Litsenziya olish uchun litsenziya talabgori litsenziyalovchi organga quyidagi hujjatlarni taqdim etadi:

a) litsenziya talabgorining nomi va tashkiliy — huquqiy shakli, tadbirkorlik subyekti sifatida davlat ro'yxatidan o'tkazilganligi to'g'risidagi guvoynomadagi turizm xizmatlarini ko'rsatish uchun amaldagi muvofiqlik sertifikati va turizm faoliyatini amalga oshirish uchun binoga huquqni beruvchi hujjatlardagi ma'lumotlarning mavjudligi, litsenziya talabgorining joylashgan joyi (pochta manzili), aloqa telefonlari, faks raqamlari, elektron manzili va bank rekvizitlari, shuningdek, ushbu Nizomning **5-bandida** nazarda tutilgan, talab etilayotgan turizm faoliyatining yo'nalishi ko'rsatilgan litsenziya berish to'g'risidagi ariza;

Oldingi tahrirga qarang.

b) ushbu Nizomning 8-bandi "b", "d" va "e" kichik bandlariga muvofiq hujjatlar nusxalari;
(9-bandning "b" kichik bandi O'zbekiston Respublikasi Vazirlar Mahkamasining 2018-yil 1-oktabrdagi 781-sonli qarori tahririda — Qonun hujjatlari ma'lumotlari milliy bazasi, 03.10.2018-y., 09/18/781/1984-son)

v) litsenziya talabgori arizasining litsenziyalovchi organ tomonidan ko'rib chiqilishi uchun litsenziya talabgori tomonidan yig'im to'langanligini tasdiqlovchi to'lov hujjatining nusxasi;

g) familiyasi, ismi va otasining ismi, tug'ilgan yili, pasportiga oid ma'lumotlar, uy manzili, ma'lumoti, aloqa telefonlari raqamlari ko'rsatilgan rahbar to'g'risidagi ma'lumotlar.

10. Litsenziyalovchi organ litsenziya berish uchun boshqa vakolatli organlarda mavjud bo'lgan zarur hujjatlar va axborotlarni belgilangan tartibda o'zaro axborot hamkorligi yo'li bilan, shu jumladan elektron tarzda mustaqil ravishda oladi.

11. Litsenziya talabgoridan ushbu Nizomda nazarda tutilmagan hujjatlarning taqdim etilishini talab qilishga yo'l qo'yilmaydi.

12. Litsenziya olish uchun zarur hujjatlar litsenziya talabgori tomonidan litsenziyalovchi organga bevosita, olinganligi to'g'risidagi bildirishnoma bilan pochta yoki elektron aloqa vositasi orqali taqdim etiladi.

Elektron shaklda taqdim etilgan hujjatlar litsenziya talabgorining elektron raqamli imzosi bilan tasdiqlanadi.

Litsenziya olish uchun litsenziyalovchi organga yuborilgan hujjatlar litsenziyalovchi organ mas'ul xodimi tomonidan ro'yxat bo'yicha qabul qilinadi, ro'yxatning nusxasi hujjatlar qabul qilib olingan sana to'g'risida belgi qo'yilgan holda ariza beruvchiga yuboriladi (topshiriladi).

Noto'g'ri yoki buzib ko'rsatilgan hujjatlar va ma'lumotlar taqdim etilganligi uchun litsenziya talabgori qonun hujjatlariga muvofiq javob beradi.

4-bob. Arizani ko'rib chiqish va litsenziya berish yoki litsenziya berishni rad etish to'g'risida qaror qabul qilish

Oldingi tahrirga qarang.

13. Ariza ko‘rib chiqilishi uchun litsenziya talabgori to‘lov kunida belgilangan bazaviy hisoblash miqdorining 2,5 baravari miqdorida litsenziyalovchi organ hisob raqamiga o‘tkaziladigan yig‘im to‘laydi.

(13-bandning birinchi xatboshisi O‘zbekiston Respublikasi Vazirlar Mahkamasining 2019-yil 28-dekabrda 1046-sonli qarori tahririda — Qonun hujjatlari ma’lumotlari milliy bazasi, 29.12.2019-y., 09/19/1046/4242-son)

Litsenziya talabgori berilgan arizadan voz kechgan taqdirda to‘langan yig‘im qaytarilmaydi.

Oldingi tahrirga qarang.

14. Litsenziya berish yoki litsenziya berishni rad etish to‘g‘risidagi qaror litsenziya talabgorining arizasi ushbu Nizomning 9-bandida ko‘rsatilgan barcha zarur hujjatlar bilan birga olingan kundan boshlab o‘n ish kunidan ortiq bo‘lmagan muddatda, litsenziyalovchi organ rahbari o‘rinbosari tomonidan tasdiqlangan ekspert xulosasi asosida qabul qilinadi.

(14-band O‘zbekiston Respublikasi Vazirlar Mahkamasining 2018-yil 1-oktabrdagi 781-sonli qarori tahririda — Qonun hujjatlari ma’lumotlari milliy bazasi, 03.10.2018-y., 09/18/781/1984-son)

15. Litsenziyalovchi organ tegishli qaror qabul qilingandan keyin bir kun muddatda litsenziya talabgorini qabul qilingan qaror to‘g‘risida xabardor qiladi.

Litsenziya berishga qaror qilinganligi to‘g‘risidagi bildirishnoma litsenziya talabgoriga bank hisob raqami rekvizitlari, davlat boji to‘lash muddati ko‘rsatilgan holda, yozma shaklda, shu jumladan axborot tizimi orqali elektron shaklda yuboriladi (topshiriladi). Litsenziya berish to‘g‘risida qaror qabul qilingani to‘g‘risidagi bildirishnoma bilan bir vaqtda litsenziya talabgoriga imzolash uchun litsenziya bitimi yuboriladi.

16. Litsenziyalovchi organ va litsenziyatning o‘zaro huquq va majburiyatlarini belgilovchi litsenziya bitimi litsenziyalovchi organ va litsenziyat o‘rtasida tuziladi, unda quyidagilar bo‘lishi kerak:

bitimni imzolagan shaxslarning familiyasi, ismi, otasining ismi, lavozimi;

tomonlarning rekvizitlari;

amalg oshirilishiga litsenziya berilayotgan turizm faoliyati yo‘nalishi;

litsenziyatga qo‘yiladigan litsenziya talablari va shartlari;

litsenziya bitimi talablari va shartlari buzilganligi uchun tomonlarning javobgarligi;

litsenziyat tomonidan litsenziya bitimi talablari va shartlari bajarilishini litsenziyalovchi organ tomonidan nazorat qilish tartibi.

Litsenziya bitimi ikki nusxada — litsenziyat va litsenziyalovchi organ uchun bir nusxadan tuziladi.

17. Turizm faoliyatiga litsenziyalar belgilangan shakldagi maxsus blankalarda rasmiylashtiriladi. Litsenziyalar blankalari qat‘iy hisobda turadigan hujjatlar hisoblanadi, hisobga olish seriyasiga, raqamiga va himoyalanganlik darajasiga ega bo‘ladi. Litsenziyalar blankalari namunalari litsenziyalovchi organ tomonidan ishlab chiqiladi va tasdiqlanadi hamda litsenziyalovchi organ buyurtmanomasiga binoan “Davlat belgisi” davlat-ishlab chiqarish birlashmasi tomonidan bosmaxona usulida tayyorlanadi.

Litsenziyalar blankalarining hisobga olinishi, saqlanishi va maqsadli foydalanilishi uchun litsenziyalovchi organ rahbari shaxsan javob beradi.

18. Litsenziya talabgori tomonidan davlat boji to‘langanligini tasdiqlovchi hujjat taqdim etilgandan va litsenziya bitimi imzolangandan keyin ikki ish kuni mobaynida litsenziya beriladi.

Ushbu Nizomga muvofiq litsenziyalanadigan turizm faoliyati yo‘nalishi litsenziyada ko‘rsatiladi.

Litsenziya litsenziyalovchi organ rahbari tomonidan imzolanadi va litsenziyatga beriladi.

19. Agar litsenziyat litsenziya berish to‘g‘risida qaror qabul qilinganligi haqidagi bildirishnoma yuborilgan (topshirilgan) vaqtdan boshlab uch oy muddatda litsenziyalovchi organga litsenziya berilishi uchun davlat boji to‘langanligini tasdiqlovchi hujjatni taqdim etmasa yoxud litsenziya bitimini imzolamasa, litsenziyalovchi organ litsenziyani bekor qilish to‘g‘risida qaror qabul qilishga haqlidir.

20. Litsenziya berishni rad etishga quyidagilar asos bo'lishi mumkin:
litsenziya talabgorining hujjatlarni zarur tarzda rasmiylashtirmay taqdim etishi;
litsenziya talabgori taqdim etgan hujjatlarda noto'g'ri yoki buzib ko'rsatilgan ma'lumotlarning mavjudligi;

litsenziya talabgorining litsenziya talablari va shartlariga nomuvofiqligi.

Boshqa asoslarga ko'ra, shu jumladan, litsenziya berish maqsadga muvofiq emas degan sabablar bilan litsenziya berishni rad etishga yo'l qo'yilmaydi.

Litsenziya talabgori litsenziyalovchi organning litsenziya berishni rad etish to'g'risidagi qarori, shuningdek litsenziyalovchi organ mansabdor shaxsining harakati (harakatsizligi) yuzasidan qonun hujjatlarida belgilangan tartibda shikoyat qilishga haqli.

21. Litsenziya berishni rad etish to'g'risida qaror qabul qilingan taqdirda rad etish to'g'risidagi bildirishnoma litsenziya talabgoriga rad etishning aniq sabablari va litsenziya talabgori ko'rsatib o'tilgan sabablarni bartaraf etib hujjatlarni qayta ko'rib chiqishga taqdim etishi uchun yetarli bo'lgan muddat ko'rsatilgan holda bir kun mobaynida, yozma shaklda, shuningdek, elektron shaklda axborot tizimi orqali yuboriladi (topshiriladi). Litsenziya berishni rad etish haqidagi xabarnomada ko'rsatilgan muddat kamchiliklarni bartaraf etish uchun zarur bo'lgan vaqtga mutanosib bo'lishi kerak.

22. Litsenziya berish rad etilishiga asos bo'lgan sabablar litsenziya talabgori tomonidan bartaraf etilgan taqdirda, hujjatlarni qayta ko'rib chiqish litsenziya talabgorining arizasi barcha zarur hujjatlar bilan birga olingan kundan boshlab besh kundan ko'p bo'lmagan muddatda amalga oshiriladi.

Litsenziya talabgorining arizasi takroran ko'rib chiqilganligi uchun yig'im undirilmaydi.

Litsenziya talabgorining arizasini qayta ko'rib chiqishda ilgari litsenziya berishni rad etish to'g'risidagi bildirishnomada ko'rsatilmagan yangi asoslar bo'yicha litsenziya berishni rad etishga yo'l qo'yilmaydi.

Litsenziya berish rad etilganligi to'g'risidagi bildirishnomada ko'rsatilgan muddat o'tgandan keyin berilgan ariza yangidan berilgan ariza hisoblanadi.

5-bob. Litsenziyani qayta rasmiylashtirish. Litsenziya dublikatini berish

Oldingi tahrirga qarang.

23. Litsenziat o'zgartirilgan, uning nomi yoki joylashgan joyi (pochta manzili) o'zgargan taqdirda litsenziat yoki uning huquqiy vorisi qayta ro'yxatdan o'tkazilgandan keyin bir oy muddatda litsenziyalovchi organga ko'rsatib o'tilgan ma'lumotlarni tasdiqlovchi tegishli hujjatlar ilova qilingan holda litsenziyani qayta rasmiylashtirish to'g'risida ariza berishi shart.

(23-bandning birinchi xatboshisi O'zbekiston Respublikasi Vazirlar Mahkamasining 2018-yil 29-oktabrdagi 884-sonli qarori tahririda — Qonun hujjatlari ma'lumotlari milliy bazasi, 30.10.2018-y., 09/18/884/2128-son)

Oldingi tahrirga qarang.

Yangidan vujudga kelgan yuridik shaxsni davlat ro'yxatidan o'tkazish sanasida turizm faoliyatini amalga oshirish huquqini beruvchi litsenziyaga ega bo'lgan litsenziatlar qo'shib yuborilgan taqdirda, litsenziyani ushbu bandning **birinchi xatboshida** nazarda tutilgan tartibda qayta rasmiylashtirishga yo'l qo'yiladi.

Litsenziyaning amal qilishi litsenziyalanadigan faoliyat turining bir qismi (qismlari) uchun to'xtatilgan taqdirda, litsenziya qayta rasmiylashtiriladi.

(23-band O'zbekiston Respublikasi Vazirlar Mahkamasining 2018-yil 29-oktabrdagi 884-sonli qaroriga asosan ikkinchi va uchinchi xatboshilar bilan to'ldirilgan — Qonun hujjatlari ma'lumotlari milliy bazasi, 30.10.2018-y., 09/18/884/2128-son)

Hujjatlar litsenziat tomonidan litsenziyalovchi organga bevosita yoxud olinganligi to'g'risidagi bildirishnoma bilan elektron shaklda yoki pochta aloqa vositasi orqali taqdim etiladi. Elektron shaklda taqdim etilgan hujjatlar litsenziatning elektron raqamli imzosi bilan tasdiqlanadi.

Oldingi tahrirga qarang.

Ushbu bandning **birinchi — uchinchi xatboshilari** talablarini buzgan holda litsenziyalanuvchi faoliyatni amalga oshirganlik faoliyatni litsenziyasiz amalga oshirish uchun qonunchilikda belgilangan javobgarlikka sabab bo‘ladi.

(23-bandning beshinchi xatboshisi O‘zbekiston Respublikasi Vazirlar Mahkamasining 2018-yil 29-oktabrdagi 884-sonli qarori tahririda — Qonun hujjatlari ma’lumotlari milliy bazasi, 30.10.2018-y., 09/18/884/2128-son)

24. Litsenziat litsenziya qayta rasmiylashtirilgunga qadar unda ko‘rsatilgan faoliyatni ilgari berilgan litsenziya asosida amalga oshiradi.

Litsenziyani qayta rasmiylashtirishda litsenziyalovchi organ tegishli o‘zgartirishlarni litsenziyalar reyestriga kiritadi.

Oldingi tahrirga qarang.

Litsenziyalarni qayta rasmiylashtirish litsenziyalovchi organ tomonidan, tegishli hujjatlar ilova qilingan holda litsenziyalarni qayta rasmiylashtirish to‘g‘risida ariza olingan kundan yoki litsenziyaning amal qilishini litsenziyalanadigan faoliyat turining bir qismi (qismlari) uchun to‘xtatish to‘g‘risida qaror qabul qilingan kundan boshlab besh ish kun mobaynida amalga oshiriladi.

(24-bandning uchinchi xatboshisi O‘zbekiston Respublikasi Vazirlar Mahkamasining 2018-yil 29-oktabrdagi 884-sonli qarori tahririda — Qonun hujjatlari ma’lumotlari milliy bazasi, 30.10.2018-y., 09/18/884/2128-son)

Litsenziyani qayta rasmiylashtirishda litsenziya talabgorining litsenziya berish to‘g‘risidagi arizasi ko‘rib chiqilganligi uchun to‘lanadigan summaning yarmi miqdorida litsenziyalovchi organ hisob raqamiga o‘tkaziladigan yig‘im undiriladi.

25. Yo‘qolgan yoki yaroqsiz holga kelgan litsenziya o‘rniga litsenziatning arizasiga ko‘ra uning dublikati ariza berilgan kundan boshlab besh ish kuni mobaynida beriladi.

Litsenziya dublikatini berishda litsenziya talabgorining litsenziya berish to‘g‘risidagi arizasi ko‘rib chiqilganligi uchun to‘lanadigan summaning yarmi miqdorida litsenziyalovchi organ hisob raqamiga o‘tkaziladigan yig‘im undiriladi.

6-bob. Litsenziya talablari va shartlariga rioya etilishini nazorat qilish

26. Litsenziya talablari va shartlariga rioya etilishi yuzasidan nazorat qonun hujjatlarida belgilangan tartibda litsenziyalovchi organ tomonidan amalga oshiriladi.

27. Litsenziya talablari va shartlariga rioya etilishi yuzasidan nazoratni amalga oshirishda litsenziyalovchi organ o‘z vakolatlari doirasida quyidagi huquqlarga ega:

turizm faoliyati subyektlaridan turizm to‘g‘risidagi qonunchilikka rioya etilishini talab qilish;

Oldingi tahrirga qarang.

litsenziat tomonidan litsenziya talablari va shartlariga rioya etilishini tadbirkorlik subyektlari faoliyatida o‘tkaziladigan tekshiruvlarni muvofiqlashtirish bo‘yicha vakolatli organ bilan qonun hujjatlarida belgilangan tartibda kelishgan holda tekshirish;

(27-bandning uchinchi xatboshisi O‘zbekiston Respublikasi Vazirlar Mahkamasining 2019-yil 21-oktabrdagi 886-sonli qarori tahririda — Qonun hujjatlari ma’lumotlari milliy bazasi, 22.10.2019-y., 09/19/886/3941-son)

Oldingi tahrirga qarang.

(27-bandning to‘rtinchi xatboshisi O‘zbekiston Respublikasi Vazirlar Mahkamasining 2019-yil 21-oktabrdagi 886-sonli qaroriga asosan chiqarilgan — Qonun hujjatlari ma’lumotlari milliy bazasi, 22.10.2019-y., 09/19/886/3941-son)

litsenziya talablari va shartlariga rioya etilishini tekshirish vaqtida paydo bo‘ladigan masalalar yuzasidan litsenziatdan zarur axborotni so‘rash va olish;

tekshirishlar natijalari asosida, litsenziya talablari va shartlarining aniq buzilishlarini ko‘rsatgan holda dalolatnomalar (ma’lumotnomalar) tuzish;

litsenziatga aniqlangan qoidabuzarliklarni bartaraf etish majburiyatini yuklovchi qarorlar chiqarish, bunday qoidabuzarliklarni bartaraf etish muddatlarini belgilash;

qonunchilikda belgilangan tartibda litsenziyalarning amal qilishini to‘xtatib turish, to‘xtatish yoki ularni bekor qilish bo‘yicha qaror qabul qilish yoki sudga murojaat etish;

litsenziyasiz turizm faoliyati amalga oshirilayotganligi to‘g‘risida aniqlangan faktlar haqidagi ma‘lumotlarni qonunchilikda belgilangan tartibda tegishli organlarga yuborish.

28. Litsenziya talablari va shartlariga rioya etilishini tekshirishda litsenziyalovchi organ xodimlari tomonidan ikki nusxada dalolatnoma tuziladi, ularning bittasi litsenziatga beriladi, ikkinchi nusxasi litsenziyalovchi organda qoladi.

7-bob. Litsenziyaning amal qilishini to‘xtatib turish, to‘xtatish va litsenziyani bekor qilish

29. Litsenziyaning amal qilishini to‘xtatib turish, to‘xtatish yoki uni bekor qilish “Faoliyatning ayrim turlarini litsenziyalash to‘g‘risida”gi O‘zbekiston Respublikasi Qonunining 22, 23 va 24-moddalarida nazarda tutilgan holatlarda va tartibda litsenziyalovchi organ tomonidan amalga oshiriladi.

Litsenziyaning amal qilishini belgilangan tartibda to‘xtatish uchun asos bo‘ladigan litsenziya talab va shartlarini bir marta qo‘pol buzishga quyidagilar kiradi:

mijozlar yoki chet ellik hamkorlar bilan tuzilgan tegishli shartnomasiz turizm xizmatlari ko‘rsatish;

turizm xizmatlari sertifikatini bilan tasdiqlangan turistlar va ekskursiyachilarning hayoti, sog‘lig‘i va mol-mulki uchun xavfsizlikni ta‘minlash tizimining litsenziatda yo‘qligi;

turizm xizmatlari ko‘rsatishda, litsenziatning shtatida “turizm” yo‘nalishi bo‘yicha oliy ta‘lim, o‘rta maxsus, kasb-hunar ta‘limi diplomi yoki litsenziyalovchi organ tomonidan belgilangan tartibda beriladigan amaldagi malaka sertifikatiga ega bo‘lgan xodimning yo‘qligi.

30. Litsenziyalovchi organning litsenziyaning amal qilishini to‘xtatib turish, to‘xtatish yoki uni bekor qilish to‘g‘risidagi qarori yuzasidan sudga shikoyat qilish mumkin. Litsenziyaning amal qilishini to‘xtatib turish, to‘xtatish yoki uni bekor qilish asossiz ekanligi sud tomonidan e‘tirof etilgan taqdirda litsenziyalovchi organ litsenziat oldida litsenziat ko‘rgan zarar miqdorida javob beradi.

Litsenziyaning amal qilishi to‘xtatilganda va bekor qilinganda to‘langan davlat boji qaytarilmaydi.

8-bob. Litsenziyalar reyestri

31. Litsenziyalovchi organ turizm faoliyati litsenziyalari reyestrini yuritadi, unda quyidagilar ko‘rsatiladi:

a) litsenziatlar to‘g‘risidagi asosiy ma‘lumotlar — tashkilotning nomi va soliq to‘lovchining identifikatsiya raqami, mulkchilik shakli, filiallar to‘g‘risidagi ma‘lumotlar, tashkilot rahbarining familiyasi, ismi, otasining ismi;

b) litsenziya berilgan sana va uning tartib raqami;

v) litsenziya blankasining seriyasi va raqami;

g) turizm faoliyati yo‘nalishi;

d) faoliyatning litsenziyalanadigan faoliyat turi amalga oshiriladigan manzil, aloqa telefoni, faks raqamlari, elektron pochta manzili va boshqa kontaktlar;

e) turizm xizmatlari va turizm mahsulotlari sertifikatlari haqidagi ma‘lumotlar;

j) litsenziyani qayta rasmiylashtirish, uning amal qilishini to‘xtatib turish va tiklashning asosi va sanasi;

z) litsenziyaning amal qilishini to‘xtatish yoki bekor qilishning asosi va sanasi;

i) dublikat berishning asosi va sanasi.

32. Litsenziyalarning reyestrlarida mavjud bo‘lgan ma‘lumotlar litsenziyalovchi organning veb-saytiga joylashtiriladi va tanishib chiqish uchun ochiq bo‘ladi.

9-bob. Litsenziya berilganligi uchun davlat boji

Oldingi tahrirga qarang.

33. Turizm faoliyatini amalga oshirish huquqiga litsenziya berilganligi uchun “Davlat boji to‘g‘risida”gi O‘zbekiston Respublikasi Qonunida belgilangan miqdorda davlat boji undiriladi

(33-band O'zbekiston Respublikasi Vazirlar Mahkamasining 2020-yil 16-iyundagi 384-sonli qarori tahririda — Qonun hujjatlari ma'lumotlari milliy bazasi, 16.06.2020-y., 09/20/384/0770-son)

34. Davlat boji O'zbekiston Respublikasining respublika budjetiga o'tkaziladi.

10-bob. Yakunlovchi qoidalar

35. Litsenziyalovchi organ va litsenziya talabgori yoki litsenziatlar o'rtasida hujjat aylanishi (ariza, hujjatlar, ma'lumotlar, xabarnomalar va boshqalar berish) qog'oz yoki elektron shaklda amalga oshirilishi mumkin. Litsenziya olish uchun taqdim etilgan ariza, hujjatlar va boshqa ma'lumotlar sifati litsenziyalash uchun zarur bo'lgan axborotlarning aniqligini ta'minlashi lozim. Litsenziyalovchi organga kelib tushgan hujjatlar va ma'lumotlar turizm xizmatlarining belgilangan litsenziya talablari va shartlariga muvofiqligiga rioya etilishini tekshirish jarayonida asl nusxalari bilan solishtiriladi.

36. Ushbu Nizom talablari buzilishida aybdor bo'lgan shaxslar qonun hujjatlarida belgilangan tartibda javob beradilar.

Turizm faoliyatini litsenziyalash tartibi to'g'risidagi **nizomga**

ILOVA

Turizm faoliyatini litsenziyalash

SXEMASI

Oldingi tahrirga qarang.

Субъектлар	Тадбирлар	Бажариш муддати
Лицензия талабгори	<p>Низомнинг 9-бандида назарда тутилган рўйхатга мувофиқ лицензия олиш учун зарур бўлган ҳужжатларни тайёрлайди.</p> <p>Ҳужжатларни лицензияловчи органга бевосита, олинганлиги тўғрисидаги билдиришнома билан почта ёки электрон шаклда тақдим этади. Электрон шаклда тақдим этилган ҳужжатлар лицензия талабгорининг электрон рақамли имзоси билан тасдиқланади.</p> <p>Ариза кўриб чиқилиши учун қонун ҳужжатларида белгиланган энг кам ойлик иш ҳақининг 2,5 баробари миқдорида йиғим тўлайди, йиғим лицензияловчи органнинг ҳисоб рақамига ўтказилади.</p>	Лицензия талабгорининг хоҳишига кўра
Лицензияловчи орган	Лицензия талабгори томонидан ариза ва барча зарур ҳужжатлар топширилгандан кейин лицензия талабгорига лицензия бериш ёки лицензия беришни рад этиш тўғрисида қарор қабул қилади.	10 иш куни мобайнида
Лицензияловчи орган	Лицензия беришни рад этиш тўғрисида қарор қабул қилинган тақдирда, бу ҳақдаги билдиришномада рад этишнинг аниқ сабаблари ва уларни бартараф этишга етарли бўлган муддат кўрсатилган маълумотлар электрон шаклда ахборот тизими орқали, шунингдек ёзма шаклда лицензия талабгорига юборилади (топширилади).	Бир кун муддатда
Лицензия талабгори	Лицензия бериш рад этилган тақдирда аниқланган сабабларни бартараф этади ҳамда ариза ва ҳужжатларни лицензияловчи органга қайта топширади.	Лицензияловчи орган белгиллаган муддатга мувофиқ
Лицензияловчи орган	Лицензия талабгорига лицензия бериш ёки лицензия беришни рад этиш тўғрисида такроран қарор қабул қилади.	5 иш куни мобайнида
Лицензияловчи орган	Лицензия беришга қарор қилинганлиги тўғрисидаги билдиришнома лицензия талабгорига банк ҳисоб рақами реквизитлари, давлат божи тўлаш муддати кўрсатилган ҳолда шу жумладан ахборот тизими орқали электрон шаклда лицензия талабгорини хабардор қилади ва айни вақтда имзолаш учун лицензия битими юборadi.	Бир кун муддатда
Лицензиат	Лицензия берилганлиги учун давлат божи тўланганлигини тасдиқловчи ҳужжатни лицензияловчи органга тақдим этади ва лицензия битимини имзолайди.	3 ой мобайнида
Лицензияловчи орган	Юқорида қайд этилган шартлар бажарилмаган тақдирда лицензияловчи орган лицензияни бекор қилиш тўғрисида қарор қабул қилишга ҳақлидир.	3 ойдан сўнг
Лицензияловчи орган	Лицензия талабгори томонидан Низомнинг 33-бандига мувофиқ давлат божи тўланганлигини тасдиқловчи ҳужжат тақдим этилганда ва лицензия битими имзоланганда тегишли бланкада лицензияни расмийлаштиради ва уни лицензиатга беради.	2 иш куни мобайнида

(ilova O'zbekiston Respublikasi Vazirlar Mahkamasining 2018-yil 1-oktabrdagi 781-sonli qarori tahririda — Qonun hujjatlari ma'lumotlari milliy bazasi, 03.10.2018-y., 09/18/781/1984-son)

Vazirlar Mahkamasining 2017-yil 6-apreldagi 189-son qaroriga
2-ILOVA

O‘zbekiston Respublikasi Hukumatining o‘z kuchini yo‘qotgan deb e‘tirof etilayotgan ayrim qarorlari

RO‘YXATI

1. Vazirlar Mahkamasining “Turizm faoliyatini litsenziyalash to‘g‘risidagi Nizomni tasdiqlash haqida” 2003-yil 11-noyabrdagi 497-son **qarori** (O‘zbekiston Respublikasi QT, 2003-y., 11-son, 113-modda).

2. Vazirlar Mahkamasining “O‘zbekiston Respublikasi Hukumatining ayrim qarorlariga o‘zgartirish va qo‘shimchalar kiritish to‘g‘risida (O‘zbekiston Respublikasi Prezidentining “Tadbirkorlik faoliyati yuritish uchun ruxsatnoma turlarini qisqartirish va ularni berish tartib-qoidalarini soddalashtirish to‘g‘risida” 2005-yil 21-sentabrdagi PQ–186-son qarori)” 2006-yil 22-maydagi 92-son qaroriga ilovaning **30-bandi** (O‘zbekiston Respublikasi QT, 2006-y., 5-son, 34-modda).

3. Vazirlar Mahkamasining “O‘zbekiston Respublikasining ayrim qonun hujjatlariga o‘zgartirish va qo‘shimchalar kiritish hamda ba‘zilarini o‘z kuchini yo‘qotgan deb hisoblash to‘g‘risida (O‘zbekiston Respublikasining “Mahsulotlar va xizmatlarni sertifikatlashtirish tartib-taomillari soddalashtirilganligi munosabati bilan O‘zbekiston Respublikasining ayrim qonun hujjatlariga o‘zgartirish va qo‘shimchalar kiritish to‘g‘risida” 2006-yil 6-apreldagi O‘RQ–31-son Qonuni)” 2006-yil 14-sentabrdagi 194-son qaroriga ilova I bo‘limining **8-bandi** (O‘zbekiston Respublikasi QT, 2006-y., 9-son, 66-modda).

4. Vazirlar Mahkamasining “O‘zbekiston Respublikasi Hukumatining ayrim qarorlariga o‘zgartirish va qo‘shimchalar kiritish to‘g‘risida (O‘zbekiston Respublikasining “Faoliyatning ayrim turlarini litsenziyalash to‘g‘risida”gi O‘zbekiston Respublikasi Qonuniga o‘zgartirish va qo‘shimchalar kiritish haqida” 2011-yil 7-sentabrdagi O‘RQ–292-son Qonuni)” 2012-yil 1-fevraldagi 26-son qaroriga ilovaning **15-bandi** (O‘zbekiston Respublikasi QT, 2012-y., 2-son, 5-modda).

5. Vazirlar Mahkamasining “O‘zbekiston Respublikasi Vazirlar Mahkamasining turizm faoliyatini litsenziyalash komissiyasi tarkibini tasdiqlash to‘g‘risida” 2012-yil 18-oktabrdagi 299-son **qarori** (O‘zbekiston Respublikasi QHT, 2012-y., 41-42-son, 486-modda).

6. Vazirlar Mahkamasining “O‘zbekiston Respublikasi Hukumatining ayrim qarorlariga o‘zgartirish va qo‘shimchalar kiritish, shuningdek ba‘zilarini o‘z kuchini yo‘qotgan deb hisoblash to‘g‘risida (O‘zbekiston Respublikasi Prezidentining “Statistik, soliq va moliyaviy hisobotlarni, litsenziyalanadigan faoliyat turlarini va ruxsat berish tartib-taomillarini tubdan qisqartirish chora-tadbirlari to‘g‘risida” 2012-yil 16-iyuldagi PF–4453-son Farmoni)” 2012-yil 1-noyabrdagi 313-son qaroriga 1-ilovaning **46-bandi** (O‘zbekiston Respublikasi QT, 2012-y., 11-son, 79-modda).

7. Vazirlar Mahkamasining “Turizm faoliyatini amalga oshirish va litsenziyalash tartibini takomillashtirish chora-tadbirlari to‘g‘risida” 2014-yil 13-martdagi 60-son qaroriga ilovaning **1-bandi** (O‘zbekiston Respublikasi QT., 2014-y., 3-son, 26-modda).

8. Vazirlar Mahkamasining “Tadbirkorlik subyektlariga davlat xizmatlari ko‘rsatish tartibini yanada takomillashtirish chora-tadbirlari to‘g‘risida” 2014-yil 31-dekabrda 377-son qaroriga ilovaning **16-bandi** (O‘zbekiston Respublikasi, QHT, 2015-y., 1-son, 9-modda).

(O‘zbekiston Respublikasi qonun hujjatlari to‘plami, 2017-y., 14-son, 231-modda; Qonun hujjatlari ma‘lumotlari milliy bazasi, 01.06.2018-y., 09/18/398/1288-son, 03.10.2018-y., 09/18/781/1984-son, 30.10.2018-y., 09/18/884/2128-son; Qonun hujjatlari ma‘lumotlari milliy bazasi, 22.10.2019-y., 09/19/886/3941-son; 29.12.2019-y., 09/19/1046/4242-son; 16.06.2020-y., 09/20/384/0770-son)